

## **EH Bildu talde politikoa**

Grupo político EH Bildu

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

## **KONTROL MOZIOA**

### **Udal aurrekontuaren egoerari buruzkoa**

Zigor Etxeburua Urbizuk, EH Bildu udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2020ko uztailaren 13an Ogasuneko batzordean aztertutako interpelazioaren ondorioa da.

### **JUSTIFIKAZIOA**

SARS-CoV-2 (COVID-19) birusagatiko krisiak erabateko astindua eragin dio gizartearen antolaketari, guztion bizimoduari, edo egun bizimodua antolatuta dugun moduari, baita Donostian ere: eredu ekonomikoa zalantzan geratu da, milaka lanpostu suntsitu dira, zaurgarritasun egoerak biziagotu eta ugaritu dira, zaintzaren egungo kudeaketa eutsiezina bilakatu da, hezkuntza eskuratzeko eskubidea ezin izan zaie bermatu haur eta gazte guztiei, oinarriko eskubideak urratu dira (poliziaren autoritarismoa eta gehiegikeriak), bistan geratu da egungo mugikortasuna ez dela eraginkorra eta kutsagarria dela... erabateko astindua eragin digu herritarroi, baita Udalari berari ere, bai bere antolaketan, eginkizunetan, baita diru kontuetan ere.

Egoera berriari aurre egiteko, Donostiako Udalak berbideratu egin behar izan ditu bere langileen eginkizunak, zerbitzuak eta diru baliabideak. Gainera, krisiak Udalaren diru sarreretan eragin nabarmena izan du, hainbat zerga eta tasarengatiko eta Foru Funtsaren diru sarrerak asko urritu baitira. Horregatik, Udal talde honek zenbait proposamen egin zizkion Udal Gobernuari eskatzeko Ogasuneko batzordeko kideekin partekatzea aurrekontuan egingo ziren aldaketen irizpideak eta eskatzeko Ogasuneko batzordeko kideei jakinaraztea har daitezkeen salbuespenezko erabakiak (kontratuak bertan behera uztea...). Denbora honetan ez dugu eskari eta proposamen horien inguruko erantzun egokirik jaso. Apirileko batzordean, zinegotziari galdetu genion horien inguruan, eta erantzun zigun ez dela aurrekontuan aldaketarik egin, lerro berezi bat sortu dela Covid19agatiko gastu berezietarako; eta ez dela kontraturik bertan behera utzi, batzuk bai eten diren arren.

Apirilean ere, Alkateak hedabide bati jakinarazi zion Udalaren 2020ko aurrekontua iraungitzat jotzen zuela. Geroztik, birritan galdetu badugu ere, azkena uztaileko batzordean, gure taldeak ez du jaso Udal Gobernuaren eskutik aurrekontuari egiten ari zaizkion aldaketen oinarririk ezta aurrekontua ez exekutatzeko hartutako erabakien zehaztasunik eta irizpiderik ere. Era beran, joandako hilabeteotan, aurreikuspen ekonomikoen inguruko txosten bakarra jaso dugu talde politikook, arina eta aski orokorra berau. Horien inguruan galdetuta, Udal Gobernuak erantzun digu egoera zehaztugabea dela; ez dakiela oraindik zenbat iraungo duen, ezta nolako eragina izango duen osasun eta ekonomia krisiak ere; ez dakiela benetan zenbat ezohiko diru sarrera izango duen, ezta nola banatuko den ere; zorpetzeko aukera zenbaterainokoa izango den ere ez omen daki.

Udal Gobernuak, ordea, 2020ko aurrekontuan jasota zeuden hamarnaka egitasmo murriztu egin ditu, zalantzan jarri ditu, edo, zuzenean, ez gauzatzea erabaki du; hala nola Morlanseko ikastetxeko egitasmoa, etxebizitzak birgaitzeko eta irisgarritasuna hobetzeko laguntzak, 2020ko laguntzen

**EH Bildu talde politikoa**

Grupo político EH Bildu

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

deialdiko lerro batzuen dirulaguntzak, Matigoxotegiko futbol zelaiko soropila berritzea, hainbat auzotako festen dirulaguntzak, Ekialdeko Barrutiaren 2019ko aurrekontuko soberakina eta 2020ko aurrekontua baliatzea, euskara ikasteko herritarrentzako 2021eko dirulaguntza saila, Merkearreko futbol zelaia... Hiriko gizarte eragileek, Ekialdeko Barrutiko Udal Batzarrak edota hainbat auzo elkartek jakinarazi digute oso kezkatuta daudela.

Gauzak horrela, EH Bildu udal taldeak ere kezka adierazten du, garai honetara iritsita, herritarrok ez baitakigu aurrekontuaren exekuzioa zertan den; zer exekutatu duen eta zer ez, ezta erabaki horiek hartzeko zer irizpide baliatzen ari den ere; orain arte zer diru sarrera izan dituen Udalak, ezta sarreren aurreikuspen berrituak zer emaitza duen ere.

Horiek horrela, honako hau da behean sinatzen duen zinegotziak aurkeztutako KONTROL MOZIOA:

**KONTROL MOZIOA:**

1.- Udalbatzak hertsatuki eskatzen dio Udal Gobernuari argipenak eta informazio zehatza emateko udal taldeoi, gizarte eragileei eta, oro har, donostiarroi, 2020ko udal aurrekontuak duen egoerari buruz: aurrekontuaren exekuzioa zertan den; egiten ari zaizkion edo egin asmo dizkion murrizketak eta aldaketak, eta erabaki horiek hartzeko zer irizpide baliatzen ari den; orain arte zer diru sarrera izan dituen Udalak, eta hurrengo sarreren aurreikuspen berrituak.

2.- Udalbatzak hertsatuki eskatzen dio Udal Gobernuari antolatzeko krisi mahai bat udal taldeokin, Covid19aren pandemiak eragindako egoera ekonomiko eta sozial makur honi irtenbidea guztion artean ematen saiatzeko.

Donostia, 2020ko irailaren 18an

Zigor Etxeburua Urbizu  
EH Bildu udal taldeko zinegotzia